

АКАФИСТ
ПРЕСВЯТОЙ БОГОРОДИЦЕ
В ЧЕСТЬ ЧУДОТВОРНОЙ ИКОНЫ
ЧЕСТОХОВСКАЯ

Акафист Пресвятой Богородице перед Ее иконой, именуемой Ченстоховская, или Непобедимая Победа

Кондак 1-й

Взбранной воеводе, упование земли русский, похвальное приносим Ти пение. Ты же, Мати Царя небеснаго, от всякий избави напасти страну нашу, и от всех скорбей и бед свободи ны, зовущия: Радуйся, Победе Непобедимая, избави нас от всякаго зла и сотвори чудо спасения.

Икос 1-й

Ангельский собор на небеси немолчно воспевае Тя, Владычице, и мы, земнороднии, притекающе ко иконе Твоей чудотворней, святым апостолом Лукою писанной, вопием Ти сице:

Радуйся, Мати света не вечерняго;
радуйся, Духа Святаго обитель священная.
Радуйся, светлое благодати познание;
радуйся, ангельских сил ликование.
Радуйся, купино неопальне горящая;
радуйся, Господа сил вечно зрящая.
Радуйся, неувядаемый цвете нетления;
радуйся, образе Христова воскресения.

Радуйся, Победо Непобедимая, избави нас от всякаго зла и сотвори чудо спасения.

Кондак 2-й

Видяще благочестие и веру святых царицы Елены, обретшия честный животворящий крест Господень, и храмы Тебе воздвигшия во Святей Земли, даровала еси ей, о Богомати, икону Свою, чрез верных служителей Своих сохраненную от лет древних, да молятся пред нею выну людие, поюции Богу: Аллилуиа.

Икос 2-й

Разумевши святая царице Елена, яко образ сей есть благословение Божие граду царствующему, постави его тамо в церкви соборней, идеже мнози от него исцеление прияша, славяще Бога и поюще Матери Божией похвалы сицевыя:

Радуйся, чаше, черплющая вечную радость;
радуйся, источнице, изливаяй неизреченную сладость.

Радуйся, чертоже рая краснейший;
радуйся, вертограде Христов славнейший.

Радуйся, Духа Святаго селение;
радуйся, Божия правды врагов посрамление.

Радуйся, духовною радостию нас утешающая;
радуйся, с верою Тя призывающих не посрамляющая.

Радуйся, Победо Непобедимая, избави нас от всякаго зла и сотвори чудо спасения.

Кондак 3-й

Сила Вышняго храняше икону Твою, Богомати, в дни ересей от поругания, и от лютых иконоборцев погубления, и от рук варварских пленения, яко Самей Ти быта хранительницею верным; такожде и нас сохрани от всякаго зла, вопиющим Сыну Твоему и Богу: Аллилуиа.

Икос 3-й

Имуще сокровище святых иконы Твоея, Богомати, святии Кирилл и Мефодий просветиста земли словенския светом веры Христовы, да уведят язычницы Бога истиннаго и прославят Матерь Божию тако:

Радуйся, идольскаго служения избавление;
радуйся, с Богом наше примирение.

Радуйся, ключу царствия небеснаго;
радуйся, помощнице жития честнаго.

Радуйся, державная наша строительнице;
радуйся, всесильная в Бозе победительнице.

Радуйся, ходатаице за всю вселенную;
радуйся, дарующая жизнь нетленную.

Радуйся, Победе Непобедимая, избави нас от всякаго зла и сотвори чудо спасения.

Кондак 4-й

В бурные дни нестроений и смут спасаше икона Твоя, Пресвятая Дево, всех притекающих к ней, и обретаху вси от Тебе покров и заступление, вопиюще благодарными сердца: Аллилуиа.

Икос 4-й

Слышаше и зряще чудеса, являемый от иконы Твоея, Пресвятая Богородице, князи галицко-русстии храниша от рода в род святыню сию, молящися пред нею умильно:

Радуйся, Агнца и Пастыря Мати нетленная;
радуйся, Дево преблагословенная.

Радуйся, матернюю любовь нам являющая;
радуйся, ризою честною всех покрывающая.

Радуйся, вечных благ надеждо верная;
радуйся, молитвеннице наша усердная.

Радуйся, Судии Праведнаго умоление;
радуйся, грехов наших прощение.

Радуйся, Победо Непобедимая, избави нас от всякаго зла и сотвори чудо спасения.

Кондак 5-й

Видяще жителие града Белза грозное нападение агарян, изнесоша на стены града икону Твою чудотворную, Пресвятая Дево, и молиша Тя о заступлении; Ты же ускорила еси на помощь им, поющим: Аллилуиа.

Икос 5-й

Проведаша всюду людие о дивнем заступлении Твоем, Богомати, яко егда нечестивии татарове стрелою уязвиша на иконе пречистый лик Твой, истекший кровию; тогда внезапно тьма и омрачение найде на ня, и друг друга убиваху тии, бежаще вспять. Вернии же, зряще чудо сие, тако благодариха Тя:

Радуйся, от нашествия иноплеменник народ христианский

избавляющая;

радуйся, от поражения верных спасающая.

Радуйся, агарянскою стрелою в иконе пронзенная;

радуйся, Мати и Приснодево неизреченная.

Радуйся, молящимся токи чудес источающая;

радуйся, печаль нашу на радость прелагающая.

Радуйся, свободительнице плененных;

радуйся, покровительнице обремененных.

Радуйся, Победе Непобедимая, избави нас всякаго зла и сотвори чудо спасения.

Кондак 6-й

Возсия благодать, и мрак исчезе, и возвысися рог людей христианских, яко Ты, Богомати, укрепляеши веру православную чудесы и знаменми от святых иконы Твоя, ихже являеши человеком, поющим Богу: Аллилуйя.

Икос 6-й

Не похотела еси, Пречистая Мати Божия, спутьствовати Отступнику от веры христианския нечестивому князю Опольскому, иже похитил бе от верных икону Твою. Ты Сама, Богородице, избрала еси местом ея храмину на горе Ясной во граде Ченстохове, идеже и доселе плененна есть латыняны, вспомоществуя всем притекающим к ней и глаголющим:

Радуйся, Мати Божия, в иконе нас ради закланная;

радуйся, Дево, от начала век предъизбранная.

Радуйся, путеводительнице к небу первейшая;

радуйся, всех ангельских сил честнейшая.

Радуйся, милосердая всех Мати;

радуйся, неисчерпаемый святой сосуде благодати.

Радуйся, просящим помощь являющая;

радуйся, доброе житие устрояющая.

Радуйся, Победе Непобедимая, избави нас от всякаго зла и сотвори чудо спасения.

Кондак 7-й

Изволивши оставити образ Свой, о Богомати, во граде Ченстохове, соделала еси возок с иконою недвижимым, егда злочестивии тати тщахуся исхитити ю; мы же, вспоминая чудо сие, славу Богу поем: Аллилуиа.

Икос 7-й

Новое чудо явила еси, Богородице, от образа Своего, поразивши слепотою и скорою смертию богохульников, иже икону Твою мечем уязвиша и на части три отсекоша; мы же сию икону Твою чтуще, величаем Тя:

Радуйся, милости Своя на нас изливающая;

радуйся, Владыку о всех умилоствляющая.

Радуйся, иконою Твоею подающая от бед сохранение;

радуйся, христиан православных спасение.

Радуйся, злыя дела запинаящая;

радуйся, милосердие Божие нам являющая.

Радуйся, в печалех и бедах утешение;

радуйся, от нечаянных смерти спасение.

Радуйся, Победе Непобедимая, избави нас от всякаго зла и сотвори чудо спасения.

Кондак 8-й

Всем притекающим к иконе Твоей и молящимся Ти скорая помощница являешия, Пресвятая Дево, якоже древле, тако и ныне, заступаеши и храниши чтущих Тя и поющих Сыну Твоему и Богу: Аллилуйя.

Икос 8-й

Убоявшеся воинства свейскаго, сокрыша маловерныя латыняне полоненную икону Ченстоховскую в земли силезския, дондеже посла Богомати на помощь ляхом православных русичей, иже изгнали суть супостата из земли словенския, вопияху:

Радуйся, света неизреченнаго таиннице;

радуйся, благодати Божия сокровищнице.

Радуйся, иноплеменных и неверных ратей одоление;

радуйся, от разорения и смерти скорое спасение.
Радуйся, горняго и дольняго мира Всецарице;
радуйся, всяческих благ подательнице.
Радуйся, от враг и от бед избавление;
радуйся, благое чудо и непрестанное человек удивление.
Радуйся, Победе Непобедимая, избави нас от всякаго зла и
сотвори чудо спасения.

Кондак 9-й

Даже в полоне покрываеши мир христианский честным
Твоим омофором, Мати Божия, на помощь к нам скоро
притекающи, купно со ангелы и святителем Николаем
Мирликийским и со всеми угодники Божий за нас пред Богом
ходатайствуеши; вонми и ныне гласу молений нас, грешных,
поющих Богу: Аллилуия.

Икос 9-й

Колико веков не слышаше Ченстоховская Богородице
молебнаго Ей пения верных, дондеже явился русский
православный царь Петр пред Образ Ея. Ему единому
отверзла есть уста Пречистая, да воспет той в слух мира
всего похвалы истинныя:

Радуйся, светом истины Божией нас озаряющая;
радуйся, руце Твоя за ны в молитве воздвигающая.
Радуйся, Бога и человеков нераздельне соединившая;
радуйся, яко смертное естество к бессмертию подвигшая.
Радуйся, верных душ райское услаждение;
радуйся, душепагубных дел удаление.
Радуйся, благочестивых христиан окормительнице;
радуйся, смиренномудрых милостивая вседержительнице.
Радуйся, Победо Непобедимая, избави нас от всякаго зла
и сотвори чудо спасения.

Кондак 10-й

Стена нератуема и ограждение твердое Ты еси людем
русским, чтущим Тя, о Божия Мати, яко во мнозех
списках иконы Твоя Ченстоховския являеши благоволение
Свое: просимое во благо подаеши и гнев Божий отвращаеши

от поющих Ему: Аллилуйя.

Икос 10-й

Спасти хотящи род человек от тьмы неверия и заблуждения, яви Богомати миру свет веры православныя, и токмо русскому воинству даде одолети двенадесять языков и крепость вражию, тамо идеже икона Твоя чудотворная стояше. И ныне воспоминающе чудо сие, тмочисленными устнами Ти вопием:

Радуйся, огнем Божественным всепросвещающая;
радуйся, мрак греха отгоняющая.

Радуйся, жестокосердия нашего умягчение;
радуйся, заблудших на путь правый возвращение.

Радуйся, стено нерушимая; радуйся, крепосте необоримая.

Радуйся, небеси и земли украшение;
радуйся, надежде нашего воскресения.

Радуйся, Победо Непобедимая, избави нас от всякаго зла и сотвори чудо спасения.

Кондак 11-й

Пение воспевает и хвалу приносим Ти, Пресвятая Дево, молимся пред иконою Твоею, на ней же зрим язвы, рукама нечестивых человек нанесенный, от наших же прегрешений незаживаемыя, но имуще Тя о нас ходатаицу, к Богу взываем: Аллилуиа.

Икос 11-й

Светоявленная икона Твоя сияет чудесы, Богомати, даже до днесь являющи нам милость Твою; многажды бо людие тщахуся вапы и хитростьми сокрыти на иконе уязвление пречистого лика Твоего, изографы же всеу трудишася, ибо паки проступаху язи, ихже мы грехми и беззаконьми нашими наносим Ти; но испроси у Бога нам отпустить долги наша, Дево, и помилуй ны, зовущия:

Радуйся, веры нерушимое забрало;

радуйся, чудес Христовых начало.

Радуйся, врат райских отвержение;

радуйся, тайны Божия всесильное проявление.

Радуйся, Богоприятное молитвы кадило;
радуйся, Носящаго вся упокоение и носило.
Радуйся, людскими грехми уязвленная;
радуйся, в любви Божией утвержденная.

Радуйся, Победо Непобедимая, избави нас от всякаго зла
и сотвори чудо спасения.

Кондак 12-й

Благодатию покрый нас, о Пресвятая Дево, исходящую от
дивных иконы Твоея, предстательством Твоим спаси и
помилуй страну русскую, в нейже во дни древния многими
чудеса просияла еси, и яви нам, молящимся пред образом
Твоим святым, чудо спасения, поющим Сыну Твоему и Богу
нашему: Аллилуиа.

Икос 12-й

Поюще пение похвальное усты недостойными, уповаем на
милость Божию и Твое, Богомати, заступление и
ходатайство за нас, грешных, пред Господем, яко да дарует
державе русстей на супостаты одоление, от иноплеменных
поган освобождение, царя православнаго во охранение, и к
царствию небесному путевождение, и выну буди с нами,
зовущими Ти:

Радуйся, державу российскую в Бозе устрояющая;
радуйся, под нозе царя православнаго вся покоряющая.
Радуйся, обличающая ереси и учения душевредныя;
радуйся, призревающая на молитвы смиренныя.
Радуйся, страны российския утешение;
радуйся, Церкви Христовой священное украшение.
Радуйся, дарующая победы верным;
радуйся, венчающая венцем нетленным.

Радуйся, Победо Непобедимая, избави нас от всякаго зла
и сотвори чудо спасения.


Кондак 13-й

О всепетая Мати, рождающая всех святых святейшее Слово,
призри ныне на царство Твое земное, на дом Твой и удел
Твой, землю нашу, и умоли Господа Вседержителя, да не

внидет в суд с нами, но да подаст нам грехов оставление, ига бесовскаго освобождение, и святой Руси воскресение, да не престанем присно вопиять Богу верою: Аллилуиа.

Этот кондак читается трижды, затем Икос 1 и Кондак 1.

Молитва Божией Матери

 всемилостивая Госпоже Царице Богородице, от всех родов избранная и всеми роды небесными и земными убажжаемая! Воззри милостивно на предстоящая пред святою иконою Твоею люди сия, усердно молящаяся Тебе, и сотвори предстательством Твоим и заступлением у Сына Твоего и Бога нашего, да никтоже изыдет отсюда упования своего тощ и посрамлен в надежде своей; но да примет кийждо от Тебе вся по благому изволению сердца своего, по нужде и потребе своей, во спасение души и во здравие телу.

Наипаче же осени и огради покровом Твоим, Милосердая Мати, грядущаго Благочестивейшаго Государя нашего, Егоже имя Ты веси; отжени от Него молитвами всякаго врага и супостата, утверди житие его в мире и тишине, да и мы вси тихое и безмолвное житие проживем во всяком благе, благочестии и чистоте; удержи грядущее царство Его во еже быти в нем царству Христову; управи пути и советы Его, да возсияет во днех Его правда и множество мира, да возрадуется сердце его о сущих в державе Его, яко сердце отца о чадах своих веселящаяся; на сопротивныя же и лукавнуция в сердцах своих пошли пред лицом Его ужас и трепет, да поне страхом вразумятся и престанут от лукавств своих и противления, творяще волю Его, яко пред Богом, от души и совести благия.

Моли, Милосердая Владычице, Пренебеснаго Бога, да присно Церковь Свою Святую соблюдет, вышним Своим благословением архиереев наших православных укрепит, миром оградит и Святей Своей Церкви целых, здравых, честных, долгоденствующих и право правящих слово Своея истины дарует, от всех же видимых и невидимых врагов со всеми православными Христианы милостивно избавит и во

Православии и твердей вере до конца веков неотступно и неизменно сохранит.

Призирай благосердием, Всепетая, и призрением милостиваго Твоего заступления на всю землю нашу Российскую, грады наши, град сей и святой храм сей, и излей на ня богатая Твоя милости, Ты бо еси всесильная Помощница и Заступница всех нас. Приклонися к молитвам и всех раб Твоих, притекающих зде ко святей иконе Твоей сей, услыши воздыхания и гласы, имиже раби Твои молятся во святем храме сем. Аще же и иноверный и иноплеменник, идя и проходя из земли отдаленная, помолится, услыши, чадолюбивая Госпоже, и сего человеколюбие и милостивно соделай, яже к помощи ему и ко спасению. Ожесточенная же и рассеянная сердца своими во странах наших на путь истины настави.

Отпадшия от благочестивыя веры обрати и паки сопричти святей Твоей Православной кафелической Церкви. В семействах людей всех и во братии нашей мир огради и соблюди, в юных братство и смиренномудрие утверди, старость поддержи, отрочество настави, мужество умудри, сирья и вдовицы заступи, утесненныя и в скорбех сущия утеши и охрани, младенцы воспитаи, болящия уврачуй, плененныя свободи, огражда ны выну от всякаго зла благостию Твоею и утеши милостивным Твоим посещением и всех благодееющих нам.

Даруй же, Благая, земли плодоносие, воздуху благорастворение и вся, яже на пользу нашу, дары благовременныя и благопотребныя, всемошным Своим предстательством пред Всесвятою Живоначальною Троицею, купно со святыми избранными угодниками Ея Кириллом и Мефодием.

Прежде отшедшия отцы и матери, братия и сестры, супруги и чада наша, и вся от лет древних припадавшия ко святей иконе Твоей сей, упокой в селениях святых, в месте светле, в месте злачне, в месте покойно, идеже несть печаль и воздыхание. Егда же приспееет и наше от жития сего

отшествование и к вечной жизни преселение, предстани нам, Преблагословенная Дево, и даруй христианскую кончину живота нашего безболезненну, непостыдну, мирну и Святых Тайн причастну, да и в будущем веце сподобимся вси, купно со всеми святыми, безконечныя блаженныя жизни во Царствии возлюбленнаго Сына Твоего, Господа и Спаса нашего Иисуса Христа, Емуже подобает всякая слава, честь и поклонение во веки веков. Аминь.

Тропарь глас 4-й

Непобедимая Победе, Владычице Ченстоховская: Древняго иже о нас благоволения Самозрительнице, будущего спасения Хранительнице, покаянием соделай ны новыя новому Царю.